

四庫全書

史部

欽定四庫全書

畿輔通志卷一百十三

箴

漢

冀州牧箴

揚雄

洋洋冀州鴻原大陸岳陽是都島夷皮服潺湲河流
夾以碣石三后攸降列為侯伯降周之末趙魏是宅
冀土靡沸炆汙如湯更盛更衰載從載橫陪臣擅命

天王是替趙魏相反秦拾其弊北築長城恢夏之場
漢興定制改封藩王仰覽前世厥厯孔多初安如山
後崩如崖故治不忘亂安不忘危周宗自怙焉有予
隳六國奮矯果絕其維牧民司冀敢告在階

明

宣宗吏部箴

周官六卿其長太宰統治百寮以熙功載漢設選部
官置尚書有佐有屬代襲弗渝致治之本實資用賢

甄拔簡任爾持衡銓爾惟敬之務公戒私善爾勿蔽
才爾勿遺必黜憊邪必進忠貞用舍適宜治由汝興
苟或貿貿弗博詢采謀面而用弗究其內玉石不分
臧否莫明治之弗興亦由汝成度德定位乃稱任使
小知大受官罔不阡精爾識鑒勵爾正直相予於治
夙夜無斁

宣宗戶部箴

君國之道子民為先黎庶既安邦本植焉相古地官

實爾之職均節惠和民乃衣食賦稅有經徭役有常
民之所供舊典式張惟爾卿佐暨乃攸屬庶幾夙夜
恪謹乃服民克阜殷樹藝以蕃上下畢之何有卒殫
惟公惟勤惟時惟允惟仁之溥而義之盡秦之商鞅
唐之宇文弼征暴括邦以不振爾惟鑒茲母縱倍克
母詭於隨母敗於墨子惟爾任爾其懋哉尚友古人
執德不回

宣宗禮部箴

聖人立極法天出治為治之本莫大於禮稽古伯夷
為虞秩宗所典三禮宗伯攸同既治神人亦和上下
政本之地實宣教化惟我祖宗承古之道品節制度
式昭禮教幽明宗卑秩乎有序大法大經靡不備舉
咨爾禮臣夙夜惟寅秉其直清以交神明安上治民
爰及四裔祇循舊章亦義之比惟卿暨佐於汝協恭
暨厥四屬於卿率從治國去禮猶耕無耜咸篤敬之
以懋政事

宣宗兵部箴

部以兵名實古司馬詰是戎兵以固華夏凡厥武臣
時遇叙勲乘馬在垆考牧用蕃車駕輿服城戍郵驛
守經制宜昏爾之職董之以卿承以衆寮簡畀維賢
庶其昭昭爾宜懋茲敬其朝夕顧諟勿忘以熙庶績
書有明訓儆戒無虞茲用教寧其可弗圖怠則隳政
貪則亂法母為泄泄母為沓沓職所宜為式克慎修
福祿攸集永孚於休思古良臣鞠躬盡瘁用是作箴

以勵有位

宣宗刑部箴

聖人制刑輔治弼教掌邦之禁惟仁之蹈咨爾刑部
卿佐暨屬惟公乃明惟明能燭匪廉弗公勉篤於行
惟敬惟慎毋忘哀矜死獄求生何昔之德移情就律
何今之刻深文巧詆實民之賊如鑑如衡刑乃弗忒
毒威以逞下情鬱堙私意以行枉直失真司命之寄
豪絲罔僻罪疑惟輕庶鮮冤抑天不可違民不可罔

斷不可續應則如響往體予仁欽哉勿渝庶幾祥刑
有永令譽

宣宗工部箴

虞舜之世垂若百工暨於成周乃設司空漢置水衡
將作少府備物致用必謹其度我朝建官列次六卿
率屬有四各底於成凡諸繕作儀品有秩辨其楮良
去華就實凡厥有位宜慎其官順理而治勿苛以殘
山澤之利羽毛齒革金鑛丹漆暨木與石為所當為

母耗於材逸所當逸母殫其力母縱已私縱則召蓄
母溺於賄溺則取敗必穢必勤必施以公百役具宜
惟爾之功其懋敬哉視古仁智率履勿愆用保祿位

宣宗都察院箴

歷代建官皆有御史任之耳目委以綱紀糾違繩愆
激濁揚清用獻嘉言惟直與明祖宗之制有長有貳
其下之屬凡十有四敷達民隱舉察官邪必究大體
母尅母頗必由中道母過不及母以賄遷母以勢懾

敦仁之存篤義之行永霜之清松栢之貞凡爾憲臣
敬慎以勗庶幾朝政資爾以肅嬖嬖姦緘默徒取充位
職是用弛國則何賴必端諸心必修諸己庶懋爾績
庶輔予理

宣宗通政司箴

通政所司實古納言出納政令用名厥官有虞之聖
后龍是職周仲山甫亦謹朝夕君為元首臣則股肱
篤念如子維彼庶民崇卑一氣流貫無間有遏弗流

體乃為患爾職於斯必敬必忠命必下究情必上通
讒說殄行師用震驚爾謹爾明予治乃成維樞維機
維喉維舌爾飭無怠庶儆在列

宣宗大理寺箴

有虞用士弼教明刑秦漢相繼廷尉是稱命曰大理
由景之世暨於今茲一以輔治列之九卿有翼有承
鑑空衡平視獄之成簡於五辟以正刑罰維過斯宥
維義之合刑不可贖死不可生惟爾是憑其可不矜

易簡明慎書戒欽恤祇率勿違乃德之吉惟官惟反
惟貨惟來終迷不復乃禍之階粵昔蘇公式敬由獄
以長王國永命攸屬嗚呼若人悠悠我思爾儀爾規
服此戒辭

宣宗翰林院箴

廷有司言自周則然後世襲用愈密而重策命所書
講學所資幾務之嚴於度於咨代有賢哲博聞明識
克勵翼之用光厥職咨爾儒臣朝夕左右必端乃志

必慎乃守啟沃之言惟義與仁堯舜之道鄒孟以陳
詞尚典實浮薄是戒謀義所屬出處乎外必存大公
罔役於私昔人四禁汝惟勵之獻納論思以匡以益
以匹前休欽哉無斁

宣宗詹事府箴

堂堂鴻業萬世攸傳儲副之建大本在焉咨爾詹事
爾其毗輔有貳有丞庶職咸具虞舜之賢資於臣鄰
矧時育德而弗資人言行政事有體有要必謹大猷

必以辰告譬如陟崇由下而升不急以休乃躋高明
爾其敬共以引以翼毋為儉佞毋肆讒慝示爾箴規
篤念勿忘克用有成邦家之光

又左右春坊箴

國之大本厥惟儲嗣天序所屬人心攸繫用輔厥德
必於正人左右春坊惟其輔臣儲君之德曰仁與義
食息言動惟道之比堯舜周孔是究是明百度以貞
其德乃成玉資琢磨乃薦宗廟宣其賢才不由輔導

爾端爾行爾正爾心非聖不道其慎其欽大經大猷
是匡是直國有元良惟爾之績

又司經局箴

聖人之道具載經籍用理萬邦用凝庶績國有儲副
天下之本惟德之修惟道之盡凡厥典冊爾實司之
爾殫爾心爾正爾思堯舜之聖惟曰仁義擴而充之
萬善斯備雜家者流反道自賢孟軻敬王不陳於前
爾其鑒茲祗乃攸服日就月將是啟是沃道積厥躬

而致於中克繼其隆時乃之功曲學阿世古人所戒
篤慎勿忘庶幾無悔

宣宗國子監箴

翼翼京都巖巖學宮首善之地是維辟雍四方髦士
來遊來學業之所專詩書禮樂學必有師為士承式
祭酒司業暨乃衆職師道克惇士乃有成俊乂奮興
為國之楨咨爾為師敬爾儀則以教以率罔懈朝夕
咨爾為學明善誠身克智與能匪敬弗臻俗化所自

賢才所出其於國家甚重而切勗爾師生咸篤於誠
無忽於行式觀厥成

宣宗欽天監箴

五帝之世歷象肇興建官作式後世襲承惟我祖宗
德合堯舜天道民事尤篤欽慎爾職於斯夙夜惟寅
用率厥屬咸致其勤必精推策必審觀候庶副欽若
爰及敬授行奉天道動協時宜在予靡愆實爾之資
惰慢而失災咎而隱予則汝罰勗哉惟謹

宣宗太常寺箴

為國之要事神理民太常典祀式交百神昔予祖考
致嚴祀享厥有純誠敬恭協相朕承丕緒思用允迪
爾祗爾肅以輔以翼儀度必飭粢盛必潔無黷無慢
凜乎對越事神之本惟心之虔豈直臨事平居有嚴
神之鑒矣來歆來止神之歆矣民之福矣無曰冥冥
洋洋有臨汝惟懋哉其慎其欽

宣宗太僕寺箴

軍國所用馬為之最軍國之政馬政亦大肆予慎之
有駸如雲既克內閒亦渙其羣疇厥庶民析之畜牧
司其政令命汝太僕政令攸宜閱省以時不愆不忘
乃蕃乃滋蚩蚩之氓國家之本氓既阜豐馬息斯奮
爾篤於民毋侵毋尅爾勤於職必敬乃德魯僖無邪
衛文塞淵爾師古人厥功懋焉

宣宗鴻臚寺箴

祗祗萬邦咸統於一朝觀會同其儀有秩咨爾鴻臚

卿貳暨屬時維爾官必莊以肅必考於度必協於中
無簡無煩周旋雍容惟動以周惟一靡慝敬慎爾儀
庶光爾職

宣宗行人司箴

法古建官以熙於治國之行人實承周制慎簡髦士
俾居俾臧朝有命令肅肅用將有容有章必敬必飭
毋為奇袤毋縱貪墨載馳載驅周爰咨諏靡及之懷
益斐弗渝克篤念茲不忝於士不忝於國有聞於世

宣宗都督府箴

天命太祖興自武功海宇既寧武備實崇皇祖皇考
敬繩祖武兵戎之政總以督府朕嗣大統祇率舊章
居安慮危夙夜不忘惟昔帝王咸奮武衛靖亂保民
安內攘外凡令兵衛布在四方總制於中有維有綱
惟是樞機爾司其柄宜敬念之以修其政將有才智
士有勇銳部伍有訓儲峙有備除治戎器豫戒不虞
政修兵堅孰敢侮予爾敬念之母忽母怠必壯其猷

以輔予治

宣宗錦衣衛箴

自古建國皆重環衛爾惟厥官朝夕廷陞予所服御
咸爾攸秩出入先後以警以蹕左右駿奔亦戒不虞
亦有匪人爾詰爾祛爾其懋懋勿縱於私宜廉宜慎
宜勤宜祇惟義之遵惟善之迪敬恭勿渝用保終吉

銘

秦

始皇帝碣石銘

遂興師旅誅戮無道為逆滅息武殄暴逆文復無罪
庶心咸服惠論功勞賞及牛馬恩肥土域皇帝奮威
德并諸侯初一秦平墮壞城郭決通川防夷去險阻
地勢既定黎庶無繇天下咸撫男樂其疇女修其業
事各有序惠被諸產久並來田莫不安所羣臣誦烈
請刻此石垂著儀矩

唐

陋室銘

劉禹錫

山不在高有仙則名水不在深有龍則靈斯是陋室
惟吾德馨苔痕上階綠草色入簾青談笑有鴻儒往
來無白丁無絲竹之亂耳無案牘之勞形可以調素
琴可以閱金經南陽諸葛盧西蜀子雲亭孔子曰何
陋之有

宋

雪浪齋銘

蘇軾

予於山中後圃得黑石白脈如蜀孫位孫知微所畫
石間奔流盡水之變又得白石曲陽為大盆以盛之
激水其上名其室曰雪浪齋云銘曰

盡水之變蜀兩孫與不傳者歸九原異哉駁石雪浪
翻石中乃有此理存玉井芙蓉丈八盆伏流飛空激
其根東坡作銘豈多言四月辛酉紹聖元
元

王孝女旌門銘

劉因

女家容城西以母喪感念遂不嫁終身州上其行御
史按實禮部令旌表之內翰盧公署其門曰孝女王
氏縣人劉因銘曰

孰不娶終身曰魯山之元道州之陽史名卓行何謂
非平常二子且然女奚責望盧公表之何用以戒荒
居庸闕銘

郝經

居庸闕在幽州之北最為深阻號天下四塞之一大
山中斷兩巖峽束石路盤腸縈帶隙罅南曰南口北

曰北口滴漚濺漫常為冰霰滑濕濡灑側輪跣足殆
六十里石穴及出北口則左轉上谷之右並長嶺而
西陰烟枯沙遺鏃朽骨悽風慘目自為一天中原能
守則為陽國北門中原失守則為陰國南門故自漢
唐遼金以來嘗宿重兵以謹管鑰中統元年皇帝即
位於開平則駐蹕之南門又將定都於燕都則京師
之北門而屯壁荒地恐起狡焉故作銘畀燕京道宣
慰府使勒石闕上且表請置兵以為設險守國之戒

云銘曰

國宅天都高寒之區居庸其樞兮遼右古北陰幽沙
磧控帶扼孤兮山連嶺重鍵閉深雄巍巍帝居兮伊
昔掣鎖金源敗破遂為坦途兮函谷一夫百萬為魚
竟執哥舒兮思啟封疆備不可忘禍生不虞兮寇不
可玩機不可緩實維永圖兮天險地險莫如人險兵
力相須兮刻銘巖岨用告僕夫當戒覆車兮

明

止戈樓銘

王世貞

大名使院之後有樓翼如藏甲仗火器若干前使顏
之曰武庫不佞蓋懷然若刺也夫武庫者漢縣官聚
五兵所也有令司之在未央蓋歷代毋改使院何以
稱焉敬為更而顏之曰止戈戈所止也於文止戈為
武曰止戈取止勿動也復系以銘其辭曰

太行之南實為沃區臂魏指趙爰翼上都饗殄鋤耨
委蛇襟裾唯易有言需有衣袂用除戎器以戒不虞

赤董之精韜以歐胡剖列五兵利剗蛟菟鬱攸司銘
厥名神樞胡以藏之穹閣彙起衡梗高疫崇墉周庀
包之虎皮倒載於庀夫既藏只亦永寧只匣有曠缺
橐有怨矢胡弗庸我竟老止此止戈為武斯義所紀
母佳母忘請俟君子

畿輔通志卷一百十三

欽定四庫全書

畿輔通志卷一百十四

頌

唐

伯夷頌

韓愈

士之特立獨行適於義而已不顧人之是非皆豪傑之士信道篤而自知明者也一家非之力行而不惑者寡矣至於一國一州非之力行而不惑者蓋天下

一人而已矣若至於舉世非之力行而不惑者則千
百年乃一人而已耳若伯夷者窮天地亘萬世而不
顧者也昭乎日月不足為明萃乎泰山不足為高巍
乎天地不足為容也當殷之亡周之興微子賢也抱
祭器而去之武王周公聖也從天下之賢士與天下
之諸侯而往攻之未嘗聞有非之者也彼伯夷叔齊
者乃獨以為不可殷既滅矣天下宗周彼二子者乃
獨恥食其粟餓死而不顧由是而言夫豈有求而為

哉信道篤而自知明也今世之所謂士者一凡人譽之則自以為有餘一凡人沮之則自以為不足彼獨非聖人而自是如此夫聖人乃萬世之標準也余故曰若伯夷者特立獨行窮天地亘萬世而不顧者也雖然微二子亂臣賊子接跡於後世矣

元

賈侯修廟學頌

吳澂

世祖皇帝既一天下作京城於大興府之北其祖社

朝市之位經緯塗軌之制宏規遠謀前代所未有也
至元二十四年設國子監命立孔子廟暨順德忠獻
王哈喇哈遜相成宗始克繼先志成其事而工部郎
中賈侯董其役廟在東北緯塗之南北東經塗之東
殿四阿崇十有七仞南北五尋東西十筵者三左右
翼之廣亦如之衡達於兩廡兩廡自北而南七十步
中門崇九仞有四尺修半之廣十有一步門東門西
之廡各廣五十有二步外門左右為齋宿之室以間

計各十有五神廚神庫南直殿之左右翼以間計各
七殿而廡廡而門外至於外門內至於廚庫凡四百
七十有八楹肇謨於大德三年之春訖功於大德十
年之秋於時設官教國子已二十年矣寄寓官舍不
正其名丞相以為未稱興崇文教之實也乃營國學
於廟之西中之堂為監前以公聚後以燕處旁有東
西夾夾之東西各一堂以居博士東堂之東西堂之
西有室東室之東西室之西有庫庫之前為六館東

西嚮以居弟子員一館七室助教居中以蒞之館南而東而西為兩塾以屬於門屋四周通百間踰年而成不獨聖師之宮巍然為天下之極而首善之學亦偉然聳天下之望遠邇來觀靡不驚駭歎美其高壯宏敞蓋微丞相其孰能贊承聖天子之德意而微賈侯亦孰能闡張賢宰相之盛心哉侯之董役也晨夕督視不避風雨寒暑措置分畫一一心計指授工師莫能違焉陞本部侍郎又陞本部尚書出領他處營

造事身雖在外心未能忘廟學也至大二年還朝拜
戶部尚書首詣廟學環匝顧瞻如其家然嗚呼世之
居官者大率簿書期會刀筆筐篋是務知政治之有
原名教之可宗者幾何人哉人咸以為迂而侯拳拳
汲汲惟恐或後蓋其資識卓矣侯少時為憲府屬憲
長誣其副柄國者仇正直欲置之死數十人皆將連
坐證左迫於拷掠悉附和以成其誣侯與在數中獨
守正不阿徇淹繫三載卒不變移受誣者藉是得脫

自戶部尚書而叅議省事也。會有羅織之獄，侯議詳
讞大忤時宰，幾與同罪，賴救解，以免。嗚呼！侯之為人
如此，宜其於聖道儒術深有契也。非資識之過人而
能之乎？侯每以范文正期國學諸生，激聞而愧，輒面
赤汗下。夫文正之為文正，無他，亦曰先天下之憂而
憂，後天下之樂而樂耳。嗚呼！安得人人不負侯之所
期者哉？侯名馴，字致道，濟南鄒平人。將歸其鄉，故著
侯之所以有績於廟學者，為頌。至大四年三月朔，國

子監丞吳澂叙詩曰於赫皇元澤彌八埏翼翼京師
風化攸先孔道曷明千古日月帝曰廟之以對先烈
顯允元臣欽輔神孫祖訓是承往聖是遵相謂而馴
而官而職乃基乃構乃墁乃甃侯領相言弗懈以虔
新宮巍巍有倬其騫宮墻之西學宮爰作我宏爾居
爾懋爾學爾士來游四方具瞻爾則匪遙像貌聿嚴
恂恂賈侯克敦克敏孰挫其廉孰混其畛一正不阿
百折不回族斯糾紛郭之恢恢廟學之崇天子之德

丞相之功賈侯之力

興學頌

危素

至正元年四月大都路都達魯噶齊喀爾公伯嘉努
請作左右南三警巡院大興宛平二縣孔子廟并建
學舍都府亟達諸禮部部上之中書省中書從其言
各以室廬之在官者為之三院之所轄五方之人聚
焉必待教而後明况二縣在於畿內教之尤弗可闕
也國朝建邦設都百年於此國學京學規制已備顧

於五廟學未遑有作而作於公尹京之日則公之於政可謂知本矣頌曰

維昔大帝即燕設都山高川迴神明相扶乃作廟學於京於國以祀先師以講道德人才勃興邦家之光小為宋稍大為棟梁三院警巡以及畿縣置師無學有弗聞見繫康里公實蒞神京治政以平豪猾震驚曰茲教化為予之責請於宰臣報可甚亟爰奏琴瑟升歌雅南籩豆在筵有赫其臨匪公言行際時之盛

化被國都風俗以正肅肅冠裾誦詩讀書凡百多士

母昧厥初

明

嘉禾頌

解縉

洪武二十有八年秋九月壬辰庚戌之朔北平永清
衛之龍門禾有異莖同穗之祥其三幹合為一仍三
穗者二二幹合為一仍二穗者六是歲大熟今上皇
帝遣使來進羣臣表賀太祖高皇帝親灑御墨為詩

一章以賜今上皇帝其詩首言創業之艱天命之不易除暴禁亂之師撫民致治之畧中言天賜豐登之慶史書垂示之嚴明堂禋薦之重末示謙冲戒謹之意為善不足之誠天矜下民之惠與民同樂之盛心溢於言表蓋不以嘉禾為可矜而以為可懼思以自勉聖不自聖兢兢業業足以垂訓於千萬年今上皇帝服膺聖訓念手澤之存諷誦追惟不能自己乃永樂三年九月朔旦用摹勒於石拓本裝治成軸分賜

諸王及近臣於是臣縉亦得與賜焉又適有嘉禾之瑞臣縉仰惟日月之光華昭著於天地其溢而上者為慶雲為景星為霞五色其下為璿珠為美玉為丹砂使人欣慕而寶愛者皆日月之餘光也古先聖帝明王有日月光華之德其禮樂文章流風遺韻之傳若詩書所刻百世之下光景常新猶足以使人欣慕與景星慶雲諸福之物同一快覩而況身被其澤目覩其盛鼓舞涵濡其有不發而為華封之祝康衢之

謠以自鳴其慶幸之萬一乎實人情之所不能自己
也拜手稽首而獻頌曰

洪武乙亥秋穀登朔方龍門嘉禾生三穗二穗交兩
騰異本同類同敷榮並珠金粟隔露凝親藩錫貢來
神京玉匣上有黃雲蒸哀衣當日御彤庭百辟忭嘉
陳休徵四野歡呼傳頌聲帝曰俞哉稽之經旅命歸
禾凜不矜作詩致戒太丁寧昌言受命畏天明降福
穰穰恐弗勝庸錫親藩鍾聖情亦知帝德由茲弘十

年事驗天威靈聖孝通天推至誠永樂重華信有禎
賜詩日閱心屏營手澤猶存訓服膺每御翰墨懷牆
羨想當睿思玉几憑智周八極通杳冥重念稼穡憂
農耕暑寒怨咨憐獨筑祇願年登百穀成羣臣環列
忭且驚百神降鑒來軒楹雲霞灼爍飛陶泓鴻章聖
藻驅風霆造化萬彙皆流形工巧人為何足稱奎章
爛爛不可名但見東壁餘光精刻以端溪紫玉英摹
本裝以龍鸞綾頒錫羣臣荷寵榮天球大訓河圖并

人文至寶莫八絃
夜夜虹光燭太清
聖子神孫萬億
齡萬世黎民歌太平

贊

漢

董仲舒傳贊

班固

劉向稱仲舒有王佐之才雖伊呂亡以加管晏之屬
伯者之佐殆不及也至向子歆以為伊呂乃聖人之
耦王者不得則不興故顏淵死孔子曰噫天喪予唯

此一人為能當之自宰我子貢子游子夏不與焉仲舒遭漢承秦滅之後六經離析下帷發憤潛心大業令後學者有所統一為羣儒首然考其師友淵源所漸猶未及乎游夏而曰管晏弗及伊呂不加過矣至向曾孫龔篤論君子以歆之言為然

唐

河間元王孝恭贊

呂溫

太極構天本由一氣大人創業資我族類堂堂河間

仁勇是經適駿有聲為唐宗英暴隋天亡羣盜猖狂
我伐用張時為哲王武有烈光為爪翼肺腸經綸八
方自南徂東晏海澄江使父兄帝天下化家為邦用
竭爾力寵臻其極言不伐色不德以遜以默柔嘉惟
則佐高祖建大勛如周旦爽與太宗守大成如漢平
勃宜君宜王磐石無疆

魏鄭公徵贊

呂溫

堂堂魏公崇節大志喬幹直聳摩天自致遭風雲時

得霸王器一言委質有死無二撫我則后各盡其志
沈浮變通龍戰既息皇建其極俾補袞職其繩則直
諤諤疑疑危言正色保太宗德弼違替否日月不蝕
黜漢霸雜行周王道人或有言秉德不撓禮興樂崇
德合道豐保合太和昭明有融起四年中復三代風
言出化成神哉厥功尹躬佐商有恥於湯公以其志
匡飾聖唐為唐宗臣致唐無疆永式萬邦

張郊公公謹贊

呂溫

有倬鄭公伋伋而貞僣僣而仁實太宗信臣有宗守
藩內難未夷圖之則安捨之則危帝臨安危機以懼
以疑以著為先知是筮是咨鄭公巍然排闥折著抗
憤正詞用人事定天意身為元龜不知不識順義之
則以定社稷鄭公之力公之云亡帝念其勤若痛在
身天懷發中哭不避辰君臣之間亶古未聞

宋

河間獻王贊

司馬光

周室衰道德壞五帝三王之文飄淪散失棄置不省
重以暴秦害聖典疾格言燔詩書屠術士稱禮樂者
謂之狂惑述仁義者謂之妖妄必蕪滅先聖之道響
絕跡滅然後慊其志雖有好古君子心誦腹藏壁局
巖鐫濟秦之險以通於漢者萬無一二漢初挾書之
律尚存久雖除之亦未尊錄謂之餘事而已則我先
王之道燄燄其不息者無幾矣河間獻王生為帝子
幼為人君是時列國諸侯苟不以宮室相高狗馬相

尚則哀奸聚猾僭逆妄圖惟獻王厲節治身愛古博
雅專以聖人法度遺落為憂聚殘補缺較實取正得
周官左氏春秋毛氏詩而立之周禮者周公之大典
毛氏言詩最密左氏與春秋為表裏三者不出六藝
不明噫微獻王六藝其遂殫乎故其功烈至今賴之
且夫觀其人之所好足以知其心王公貴人不好侈
靡而喜書者固鮮矣不好浮辯而樂正道知之明信
之篤守之純而行之勤者百無一二焉武帝雖稱好

儒好其名而不好其實慕其華而廢其質是以好儒
愈於文景而德業後之景帝之子十有四人栗太子
廢而獻王最長嚮若遵大義屬重器用其德施其志
無神仙祠祀之頌宮室游觀之費窮兵黷武之勞賦
役轉輸之敝宜其仁豐義洽風移俗變煥然帝王之
治復還其必賢於文景遠矣嗟乎天實不欲禮樂復
興耶抑四海之不幸而已矣

邵堯夫先生贊

朱子

天挺人豪英邁蓋世駕風鞭霆歷覽無際手探月窟
足躡天根間中今古醉裏乾坤

劉忠肅公像贊

朱子

第登黃甲官侍紫宸出則循吏入則良臣忠悃已據
讜論亦陳光昭先烈如公幾人

元

靜修劉先生畫像贊

歐陽玄

微點之狂而有沂上風雩之樂資由之勇而無北鄙

鼓瑟之聲於裕皇之仁而見不可留之四皓以世祖之畧而遇不能致之兩生烏虜麒麟鳳皇固宇內之不常有者也然而一見而六典作一出而春秋成則其志不欲遺世而獨往也明矣亦將從周公孔子之後為往聖繼絕學為來世開太平者耶

默菴安先生畫像贊

歐陽玄

寤寐乎明善誠身之書步趨乎格物致知之學闢西三鱸未必榮於教授之四世荀陵八龍奚以過於伯

仲之一壑豈非白茅重而忠信著玄酒醇而嗜慾薄
者乎鍾期伯牙有同世而不相遇者吾故於默庵之
神交而益以重容城之先覺也

威如蘇先生畫像贊

歐陽玄

英英紫芝皎皎素絲冥摻遠討默識近思子雲精深
季海孝友德人之容君子之守

郎中蘇公畫像贊

歐陽玄

維子寧父為名卿士其心塞淵如古君子既合於古

詎諧於時職是正直弗究厥施居家嗃嗃在國諤諤
屹如長松矯如一鶚蚤以讜言屢忤權相晚著惠愛
足食邊饒剛者必仁仁必有後宜爾有子簡自造秀
遺像儼然不亡者存九原可作孰敢吏雲

明

田疇贊

方孝孺

古之觀人不於用舍考其所存以第高下譬諸龍駒
垂首糞車豈以其賤斥之為驚齊侯千駟如南面王

仲尼之歎夷齊有光漢季分爭得國者操吾獨何為
田疇是悼操雖據國犬鼠之雄殺后無君天下不容
奚若田疇忠義蓋世委質劉虞身死靡貳使受之命
為漢大臣殺操復漢必不顧身嗚呼鄙夫惟利是就
誰能為疇我與為友

本朝

五十生日小像自贊

魏象樞

這個漢子生來甚孱著衣喫飯行五十年肝腸自白

氣質猶偏有體無用多經少權日月易邁老大徒憐
曾記得你二十以前初通章句頗習詩篇繫童心耳
若處女然漸傷比匪遂濁蒙泉二十以後三十以前
形骸放浪意氣飛騫非貧非痛如狂如顛科名僥倖
際遇速遭嚴君蚤背亂世相延投鼠忌器得魚忘筌
偽職不染餘生苟全三十以後四十之前明運既革
清詔乃宣勉應

國制竊綴朝班交遊罔擇趨向弗專既讀中秘尋改科

員心期鳴鳳口類寒蟬叨蒙

寵召恭侍

御筵一堂克濟三代竚看

君恩愈重臣節難完濫佐計典誓絕一錢仰質天日俯對
班聯不干政府不謁司銓妄談古禮懶逐塵緣孤而
匪傲方而勿圓小人欲殺大德同天雨雪誣讎三宥
罪愆崖邊收馬江心補船年四十矣而無聞焉上承
先聖次希諸賢制行不逮立志惟虔學纔半步道在

雙肩二三師友日夕周旋願為後勁須著先鞭辭官
養母上疏歸田庭闈菽水祠祀豆籩顯揚未盡持守
彌堅里黨何事風化為先獨慚涼德幸遇好官宣陳
六諭講肄聖傳於人寡效在己必蠲名教之樂天地
之寬嗜欲之寡夢寐之安此理欲界是人禽關手中
一卷腹內三餐自問自答我愚我頑長無尺寸短有
萬千知過必改見善則遷五十已至自今勉旃

宛平王公像贊

陳廷敬

階平星聚泰運肇啟二五儲精誕生夫子神觀挺拔
才名日起受知

世祖顧問密邇綸扉視草籌政決疑謂宜大任燕翼是貽我
皇踐阼表率憲司數奏封事正議忠規三垂不靖怙衆作
逆九伐張皇中樞運策櫓檣迅掃宗社磐石遂陟台
衡皋夔接跡稽典定法教洽治宣黼黻衣被徧於九
埏退朝晏坐泰宇翛然誰其侍側玉樹風前鄴侯既
相仙骨在軀精神淵著不視體膚謏謏清舉溫溫德

符麟閣凌煙此為之模

蔚州魏果敏公象樞贊

陳廷敬

國僑以惠公叔以文稱名責實公清最聞緒宗聖學
道集儒勲頌詩讀書百世彌尊



畿輔通志卷一百十四

欽定四庫全書

史部

畿輔通志卷一百十五

詳校官監察御史_臣劉人睿

檢討_臣德生覆勘

總校官進士_臣繆琪

校對官中書_臣牛稔文

謄錄監生_臣畢桂

欽定四庫全書

畿輔通志卷一百十五

賦

漢

冀州賦

班彪

夫何事於冀州聊託公以遊居歷九州而觀風亦哲
人之所娛望常山之義義登北嶽而高遊建封壇於
岱宗瘞玄玉於北丘徧五嶽與四瀆觀滄海以周流

東征賦

曹大家

惟永初之有七兮余隨子兮東征時孟春之吉日兮
撰良辰而將行乃舉趾而升輿兮夕余宿乎偃師遂
去故而就新兮志愴恨而懷悲明發曙而不寐兮心
遲遲而有違酌樽酒以弛念兮喟抑情而自非諒不
登巢而琢蠡兮得不陳力而相追且從衆而就列兮
聽天命之所歸遵通衢之大道兮求捷徑欲從誰乃
遂往而徂逝兮聊遊目而遨魂歷七邑而觀覽兮遭

鞏縣之多艱望河洛之交流兮看成臯之旋門既免
脫於峻嶮兮歷滎陽而過武卷食原武以息足宿陽
武之桑間涉封丘而踐路慕京師而竊歎小人性之
懷土兮自書傳而有焉遂進道而少前兮得平丘之
北邊入匡郭而追遠兮念夫子之厄勤彼衰亂之無
道兮乃困畏乎聖人悵容與而久駐兮忘日夕而將
昏到長垣之境界察農野之居民睹蒲城之丘墟兮
生荆棘之榛榛惕覺悟而顧問兮想子路之威神衛

人嘉其勇義兮迄於今而稱云遽氏在城之東南兮
民亦尚其丘墳唯令德為不朽兮身既歿而名存惟
經典之所美兮貴道德與仁賢吳札稱多君子兮其
言信而有徵後衰微而遭患兮遂陵遲而不興知性
命之在天由力行而近仁勉仰高而蹈景盡忠恕而
與人好正直而不回兮精誠通於明神庶靈祇之鑒
照兮祐貞良而輔信亂曰君子之思必成文兮盡各
言志慕古人兮先君行止則有作兮雖其不敏敢不

法兮貴賤貧富不可求兮正身履道以俟時兮修短
之運愚智同兮靖恭委命唯吉凶兮敬慎無怠思謙
約兮清靜少欲師公綽兮

魏

趙都賦

劉 邵

且敝邑者固靈州之敝宇而天下之雄國南則有洪
川巨瀆黃水濁河發源積石經拂太華灑為九流入
於元波其東則有天浪水府百川是鍾包絡坤維連

薄太濛其北則有陶林元壇增冰沍寒其西則有靈
邱平圃斜接崑崙其近則有天井句注飛狐太行瑤
錯環珞屬阜連岡龍首嵯峨以岷鬱羊坂崙嶺以岷
塘清漳發源濁滏汨越湯泉涸沸洪波漂厲爾乃都
城萬雉百里周迴九衢交錯三門旁開層樓竦閣連
棟結階峙華爵以表薨若翔鳳之將飛正殿儼其造
天朱櫺赫以舒光盤蚪螭之蜿蜒承雄虹之飛梁結
雲閣於南宇立叢臺於少陽及至暮秋涉冬朔風烈

寒猛豺鷲搜鷹隼奮翰國乃講武狩於清源駕鷺冥
之駿駿抗冲天之旌旃北連昭餘南屬呼池西眄太
陵東結繚河然後嘆子放機戈矛亂發決斑髻破文
頰當手斃僵應弦倒越爾乃進夫中山名倡襄國妖
女狄鞮妙音邯鄲才舞六八駢羅遞奏迭舉體凌浮
雲聲哀激楚其珍玩服物則崑山美玉玄珠曲環輕
綃啓繒織纈綈其器用良馬則六弓四弩綠沉黃
間堂嶮魚腸丁零角端飛兔奚斯常驪紫燕豐鬣確

顧龍身鵠頸目如黃金蘭筋參精迅躡飛浮軼響追
聲若乃至季春元己辰火熾光挺新贈往被於水陽
朱幕蔽野綵帷連岡妖冶呈飾顏如春英

唐

燕昭王築黃金臺賦

張式

燕昭以齊魏黷武楚趙專征地僻援寡城孤勢輕體
未遑於安席心每寄於懸旌外矜嚴以示懼中慷慨
而不平欲羅天下之彥總海內之英爰築臺於國以

尊隗為名知夫喬林之木可選他山之石可轉將在
物之非珍謂求覽之不顯苟白駒之可繫信黃金之
可賤且設而為己則已奢設以為人則為善岌然既
就赫矣斯存象徘徊於前殿色晃朗於朝曦人所貴
惟金我以為土時以士為賤我以為尊誠列辟之未
制掩前經之所論昔銅雀創於鄴都陽臺起於荊國
聳高麗之殊觀備珍奇而盡飾徒竭用而殫人自矜
豪而逞力洎夫遺情總帳徒愴淫心結夢巫山空資

穢德豈同夫慮成經始所寶惟賢初假物以求士終得魚而忘筌不然者烏將棲於茂樹魚自躍以深淵臣亦效誠於大國人誰遠仕於弱燕所謂興亡必繫於賢哲勝負寧由於衆寡庶斯焉而取斯誠大者而遠者及夫劇辛不召而至樂毅無媒而萃咸委質而納忠願長途而騁驥然則賢為強國之器臺寶招賢之餌空悲霸業之雄不覩濫觴之自異乎哉歷萬古而共觀信諸侯之一致後之士寧無郭隗之才後之

君但守燕昭之位是以千乘雖貴一士雖微必禮之
而後為用必求之而後能歸不可誘之以利不可劫
之以威因酌古以道意惜臺平而事非

漢光武渡滹沱冰合賦

獨孤及

昔漢光武收河北之年馳馬將進滹沱在前為敵所
迫當冰不堅及軍裝隱轡以登岸殺氣崢嶸而塞川
意者欲定神器於茲日彰聖人之動天若非使不道
者喪有德者王則水不能以造次而結冰不能以斯

須而壯變浩浩之流為戔戔之狀擁高旌以進雷長
轂以上及企路以全軍又迎風而破浪於時進隔關
於長津顧邀遮其後塵患勢莫之敵沒不可振求一
徑而莫遂惟羣臣之不親賴王霸至誠之力協光武
至聖之德人從悅已之詐天贊勤王之直故得舟楫
不設衣裳不濡避地以往乘冰以趨一水之上兩軍
相殊使後人視水則有求冰則無望飛塵而惆悵對
寒流而踟躕由是知天人之合發與神祇而相符不

然則何以延十二之祚總四七之輔滅新室毒流之
日作漢氏中興之主受命之瑞也亦何異元女降於
軒轅白魚躍於周武燕趙之間清流瀾瀾高風以遠
遺躅於是

市駿骨賦

韋執誼

代有良驥勤求可致上心好也固有開而必先朽骨
沽諸蓋不期而自至於是搜延廐發屠肆出千金
而易之獲一骹而無棄不賈其用雖增飾而無成將

慮其先使雄名而不墜昔之服纓玉飾軌條追長風而噴沫先急景而揚鑣豈知剏駿足於千里摧壯心於一朝權含月而共落蹄帶雪而俱銷當其死而不顧豈其生而可招是以服其無數守而無失外揚嘉善之名內作旁求之術伊希代之異產固入用而無必處南中之穴莫測從來遊北土之衆殆將安出聿求既彰類聚其方人獻駉驥天降此祥滅虞之役不興取諸外殿伐燕之師不舉貢自遐荒蓋將翕必張

期於至止俾善始而令終寧賤目而貴耳假其力既
重之於生思其勞曷輕之於死物以德易道由人弘
當不遇其知乃負車而伏櫪苟應乎其感必蚪躍而
龍騰故八駿咸臻萬邦為楮物非其產將命逾遠而
來骨在於斯何惜發幣而買亦猶賢士所趣知機彙
征田忌收老以成仁卒強齊國燕昭市骨而種德乃
獲樂生覩求賢之未暢悟得駿之悲輕儻長鳴之見
識庶吾道之將行

宋

中山松醪賦

蘇軾

始余宵濟於衡漳車徒涉而夜號燧松明以記淺散
星宿於亭臯鬱風中之香霧若訢余以不遭豈千歲
之妙質而死斤斧於鴻毛效區區之寸明曾何異於
束蒿爛文章之糾纏驚節解而流膏嘻作厦其已遠
尚藥石之可曹收薄用於桑榆製中山之松醪救爾
灰燼之中免爾螢燭之勞取通明於盤錯出肪澤於

烹熬與黍麥而皆熟沸春聲之嘈嘈味甘餘而小苦
歎幽姿之獨高知甘酸之易壞笑涼州之葡萄似玉
池之生肥非肉府之蒸羔酌以瘿藤之紋樽薦以石
盤之霜螯曾日飲之幾何覺天刑之可逃投拄杖而
起行罷兒童之抑搔望西山之咫尺欲褰裳以遊遨
跨超峯之奔鹿接挂壁之飛猱遂從此而入海眇翻
天之雲濤使夫嵇阮之倫與八仙之羣豪或騎麟而
翳鳳爭榼挈而瓢操顛倒白綸巾淋漓宮錦袍追東

坡而不可及歸鋪歎其醜糟漱松風於齒牙猶足以賦遠遊而續離騷也

金

琅山賦

趙秉文

在易州境俗謂之郎君山峯巒秀拔頗似少華尾箕之精琳瑯之英鍾奇孕瑯山播形帝敕六丁移來玉京六鼇負背三山蓬瀛萃兮直上劍拔崢嶸表兮獨立霜秋氣橫骨非肉附勢敵天勃呀然而門繚然

而城其門伊何竅鑿巨靈隔山見山翦碧紛青素月
夕起白雲晝局其下雷峽隱隱屹屹石崖嵌空龍門
天成孰剗孰鑿不騫不騰飛泉中來華擘河傾或迸
而流或迴而泓下赴兩洪砮轟雷霆百步之外不聞
人聲蘊蘊隆隆洞潭窈冥石席可據窪尊可銘浮雲
悠悠千古此情其城伊何繚以重崕疊嶂環抱中心
砥平峩峩而仙巖巖而亭有駢斯指有植斯屏摩雲
障日韜河映星千態萬狀不可殫名李白杜陵巨然

道寧九原骨醉千日豈醒瘦武盡隱老任墨卿一朝
擲筆萬里騎跡崆峒九華天台四明迥絕入境虛標
仙經神州奧區燕南福庭可杖可屨或仕或耕信步
陟降朝昏送迎春山水流秋空月明巖泉夜落松風
晚清游心太玄何慮何營

叢臺賦

趙秉文

歲辛亥之孟冬兮余解印而南歸覽全趙之形勝兮
弔荒臺之故基太行車走以南來兮漳水改道而東

馳伊川谷之變易兮矧人事之推移獨歸然其凌空
兮意神物之所護持問父老以陳跡兮猶有雙塔野
花之詩也噫七龍擾擾虎戰以龍爭兮譬事勢於連
雞或爭桑於延敵兮有以酒薄而名園朝膏血於秦
漢之草野兮夕暴骨於齊魏之沙陲翫生靈於刀几
兮決一旦之雄雌得地不足以贖民之命兮忍勞民
而築斯方主父變服而事威武兮固一世之雄才收
中山林胡為未厭兮又窺秦室之狼豺歸來置酒延

眺八極兮俯不見蕭牆之孕災噫翟犬之夢兆兮識
百年之厲階何苔華之新寵兮晏酖毒之孔懷厭離
宮別館之湫隘兮起高臺之崔嵬笑章華制度之狹
陋兮又況采椽與茅階輦路縈紆以雲疎閣道行空
而飲霓奏金石於雲端兮悅鈞天之夢未迴下仰望
而不聞兮微風過而聲哀金輿玉輦君王來其間兮
左趙女而吳娃朝琴夜筑為王歌舞兮樂未極而哀
隨探雀穀於離宮兮豈憶熊蹯與豹胎痛父子斃於

一朝兮人亦念骨肉之瘡痍也古往今來日東月西
驚歲華之跳丸悼興亡之奕棋歎趙國之城郭兮變
都成邑而變骨成灰慨平原之池館兮高者榛丘下
者荒陂狐兔穴於丘陵兮草木深於宮闈地荒蕪而
獸伏兮天莽蒼而鳥馳沈顧寂聽心傷思摧但聞蕭
條之聲非竹非絲迫而聽之乃在乎羽蟲之摩軌與
衆竅之翕吹也嗚呼臺向時之臺也山川花鳥亦向
時之山川花鳥也山川花鳥不能知此臺之興廢而

臺亦安能知人之悲歡而人自悲之然則靚妝炫服
臺非以為榮也而荒榛斷址臺又奚以辱為然而文
王之靈臺燕昭之黃金當時稱賢者之樂後世為美
談之資而是臺也蒙亡國之恥興山木之歌亦臺之
不幸而強嗤且夫今日之悲昔日之樂也騷人懷之
而賦咏行客過之而歔歔嗟舊物之都盡獨天留兮
此臺閱千秋兮萬古作龜鑑乎方來意者使一日之
樂易萬世之譏也而臺亦何負於後世哉可弔而不

咤也亂曰洪波之臺傷周舍於既死兮後世之君不
能起廉頗於未衰干將之劍忍能誅忠魂於李牧兮
不能斷讒舌於郭開係梁棟兮既折噫大厦兮將頽
非一臺足悲國無人兮吁可悲

元

橫翠樓賦

劉因

金臺雄壯甲天下而山水人物為最也其西北有峯
望之巍然而立巍然而高琅然而秀者郎山也其西

四十里有泉穴城而來流分而派衍環乎市井之間
為一時之偉觀者雞水也水之上又多樓亭臺榭之
美而宏麗傑出俯瞰閭閻騁懷游目足以極登臨之
勝槩者橫翠樓也樓之上飄輕裾曳長袖解劍指廩
醕酒臨江養胸中之天地游物外之文章為燕南文
物之冠冕者樓之主人也主人觴於斯詠於斯會賓
客於斯見千巖萬壑盤紆拂鬱而空致乎几案間故
樂而名之曰橫翠也然而樂其所以樂者非直為景

物役也將以取山水之秀而助其氣也若夫嵯我葉
巢刻削峯巒混涵天地呼吸萬壑斬絕峻拔嶷嶷然
有可望而畏之者與秋色而相高也雲開日出雨霽
虹消巖壑霽對若拂嵐撲黛靄靄然有可喜而翫之
者朝來之爽氣也霜露既下木葉盡脫水窮霞盡天
高驚飛微微螺髻隱隱蛾眉者天寒而望遠也日上
壁而乘彩月上軒而飛光開簾挂笏把酒而觴者翠
屏之晚對也朝暉夕陰烟容雨態如萬物供四時而

無窮也由是而觀之主人氣象巍然襟韻磊落靈臺
洞月玉骨橫秋飄飄然有凌雲之風者殆不偶然也
燕趙諸公多以歌詩道其美記之者有陵川之雄文
詠之者有木菴之絕唱前人之述作已備主人復以
大命僕僕輒不自揆拾人之滯穗丐人之殘炙亦為
之賦而贅之於后其辭曰

丙寅之秋七月與主人相攜登於橫翠之樓覽斯宇
之所處極滄溟之盡頭地連西鄙雄冠中州星分箕

尾州別冀幽控鴈門之右塞引雞距之清流倚太行
之宕觀接易水之長洲有如陰雲慘慘晦日冥冥林
巒失色巖壑潛形或風雨驟至汨然如半夜之潮生
或波濤怒捲湧然如萬馬之軍聲使人魂飛膽慄心
折骨驚倏然失視悚然忘形怛惻憐慄兮而若有遠
行者乎又如雲開山色雨沐秋容天光接塞水影涵
空浮一天之灝氣快千里之雄風使人邁飛逸興浩
發吟魂如登太山漂崑崙有可挾日月而薄風雲者

乎又如騁出岫之白雲傲橫空之素靄揖列壑之青
嵐訪攢峯之翠黛窮島嶼之縈迴觀宇宙之宏大吞
燕趙之精英吸乾坤之沆瀣發胸次之瑰奇豁中襟
之滯芥其亦有思乎古人之登高而弔古傷時而感
慨也若乃太行之英郎山之靈開岫幌闢巖扃收霧
幃列雲屏供詩情於晚翠貢圖畫於新晴於時吾與
子詠春風於舞雩濯塵纓於滄浪來登斯樓終日徜徉歌紫芝之曲酌明月之觴渺天地於一粒隨造化

而翱翔期萬代於咫尺順四時而行藏下視萬物杳
焉如千里毫芒然後囂囂然洋洋然庶乎可以與天
下俱忘者矣

石鼓賦

周伯溫

余嘗考古石刻而岐陽石鼓為第一每讀韋韓蘇三
君子之歌心蓋竒之訪諸士大夫俱在京師欲往一
觀而無由也皇上踐祚之始年有詔置石鼓太學遂
列於宣聖廟之兩塾尊之也明年改元皇慶余列國

子生撫玩之獲償所願夫以三代遺物置庠序中盛典也韓詩有云聖恩若許留太學諸生講解得切磋蓋欲而不得故冀之於乎韓公不得見於昔時而吾輩得見於今日何幸如之輒為賦曰

周有石鼓今在辟雍列橋門而甲乙相輝映於西東紛質理之泐蝕偉形制之穹崇有文秩秩有詞渢渢法皇頡之妙畫續小雅之變風蔚兮九天之儀鳳蜿兮六合之神龍欣獸魚之物庶嘉車馬之攻同厯厯

兮瓊株森竦於元圃依依兮神雲隱見於蒼穹嗟追
琢之渾厚或制作於天工於赫宣王弘振頽綱四國
既遂百職既張睠茲農暇載飾戎行踵武前人蒐於
岐陽史籀才藝當時俊良播於聲詩勒之琳琅其形
之不一者因樸質之自然其數盡於十者表治極而
功揚在戰國暴秦而韜晦者抑貞介遠其汙辱歷兩
漢六朝而不泯沒者必神物為之護防歲紀茫茫顯
於李唐韋韓歌之藹其有芳迄宋宣和斯遷於梁金

人襲沒遂歸朔方維天子之龍飛瞻文運之日昌誕
降德音輦登上庠文石重籍周衛兩旁六經彛訓因
時表章大比曠典同日舉揚遐邇縱觀陳跡復彰嗟
夫九州之鼎已沉淪而不可得岵嶺之石又漫滅而
不復有惟斯文為至寶實終古之罕偶惜据撫之有
遺不見稱於魯叟何人之蚩蚩窪一為白質損文存
庸詎永久後乎此者豈無祖龍之頌功茂陵之封禪
亦皆埋仆於榛莽雖萬一之或傳適足以著其君之

無取然則石鼓之周流於世者天非徒壽之蓋以寄
古文於不朽也乃作詩曰刻石鼓兮周賢王置之學兮
自我皇紛胄子兮樂未央日詠歌兮揚揚維大道兮
無疆齊地久兮天長維斯鼓兮作配勿壞兮勿傷保
億齡兮於耿光

燕山八景賦

陳櫟

粵自昔之京師稱為衆大之區今大業之覆燾亘亘
古之所無建皇都於燕山信廣大而超卓稽載籍之

所傳跨毫殷與京洛仰景致之佳絕殫泓穎而難窮
味綺名之有八恍莫指其形容仙凡隔於苑牆邃深
而瓊其島天永縱夫陽春花命長而鮮好池雖仍於
古稱芙蕖豔其佳色與景秋而最宜涼颼生夫粼碧
橫晴虹之下垂瀦為瓊玉之漿幾萬斛之珠滴歲釀
萬壽之觴愛一臺之天成金知出於誰鑄待夕陽之
照出色黃明而自媚山屹峙於兌方席花積而崢嶸
市烘黃綿之襖天現白玉之屏津趙北與燕南雞呼

兔而澄澈銀蟾竦之高卧玉梭猊其如活軒轅裔之
薊封雨飛門而河翻妙勝廬阜之瀑高出龍門之灘
史嘗紀夫居庸名列三關之一山堆皺而萬疊翠欲
滴於一色是為八景之畧媿其詳之未知彼瀟湘與
鳳翔亦八題之昭如茲偏方兮下國景何一二而數
衆大古莫擬之豈八景而但已山水自於西北景清
淑之所鍾地廣漠而深厚極城闕之宏崇合官府兮
市里登民物之富庶孰非可觀之景顧觀光之猶未

將究極而論之曰在德不在景山川以人而重德與
景而悠永毫殷京洛之區今視昔而依然謂愚言之
不信何一盛而莫肩如宋玉想像夫高唐蘇子親見
夫度境雖鋪張恐涉於虛無知初詠未得其要領也

黃金臺賦

楊維禎

懷美人兮天一方曰燕然兮故邦耿寒照兮析木黯
雲蕪兮武陽瞻崇臺之千尺兮敬弔昭王南山松柏
兮度材孔良載秣載秣兮厥土燥剛上千瀕洞兮下

鎮鴻龐出沒塵霧兮蔽虧景光增黃金之改觀兮聳
具瞻乎四旁吾不知壯麗之所出兮曰聘士之皇皇
嗟甘棠之子孫兮胡崎嶇於蠻貊鍾噲之之遺禍兮
受強齊之控扼嗜若虢虎兮威若雷霆蹇吾冲之嗣
祚兮哀力單而勢輕弔遺黎之疾苦兮銜前人之憤
烈思英雄以共奮兮庶國恥其可雪千金一擲兮聘
席之珍尺璧非寶兮寶於仁人市遺骨以招駿兮續
龍媒其奮趾劇不召而自至兮鄉聞風而亦起毅委

質以駿奔兮爭來輕於千里蓋一誠之感激兮固非
黃金之所餌也寶鼎九廟兮金城四壁大邦懷勢兮
小邦畏力振吾旅於臨淄兮迫窮寇於莒墨齊器設
於寧臺兮故鼎返於磨室洒九京之宿憤兮誠一時
之偉績也嗚呼鹿之臺以賄敗兮瑤之臺以侈亡雲
夢蕩乎游盤兮姑蘇鵠乎內荒戲馬鄙於刑印兮銅
雀泣乎分香哀章華與望海兮踵神明與柏梁編以
金玉兮絡以綺組羅列垂棘兮錯落元圃國士一空

兮禍國之府想昭王之清風兮增激古之慨慷去千
載如一日兮金之臺至今其有耿光嗚呼噫嘻望碣
石兮山嵯嵯涼風蕭蕭兮易水波訪故址兮何在招
望諸兮悲歌易可竭兮碣可磋高臺之風兮不可磨
明

皇都大一統賦

楊榮

維皇明之有天下也於赫太祖受命而興龍飛淮甸
風雲依乘恢拓四方弗遑經營既渡江左乃都金陵

金陵之都王氣所鍾石城虎踞之險鍾山龍盤之雄
偉長江之天塹勢百折而流東炯後湖之環繞湛寶
鏡之涵空狀江南之佳麗滙萬國而朝宗此其大畧
也迨於聖皇嗣大一統剛健日新聰明天縱圉四海
以為家登羣賢而致用思繼志之所先惟都邑之為
重於是天意鑒觀人心和同神靈效順龜筮協從既
應天以順時爰辨方而正位視往聖而獨超繼高皇
之先志乃相乃度載經載營眷茲北京山川炳靈其

為形勢也西接太行東臨碣石鉅野亘其南居庸控
其北勢拔地以崢嶸氣摩空而崩方復有玉泉漫流
宛若垂虹金河澄波雪練涵空膏渟黛蓄浩渺冲融
包絡經緯混混無窮貫天河而為一與瀛海其相通
爾其派連析津源分潞水既環抱以縈迴亦瀰茫而
清泚來職貢於四方通檣帆於萬里至若王畿之內
輦轂之間沃野彌望原陸寬閑烟火相接雞犬相聞
宵無警柝外戶不闔以牧則蓄以種則穫以佃以漁

以耕以鑿隨其所營皆得其樂而其為都也四方道
里之適均萬國朝覲之所同梯航玉帛為都邑之會
陰陽風雨當天地之中爰勅臣庶爰伐材木南浮湖
湘西入巴蜀斧披虹霓聲撼山谷徂徠之儲新甫之
蓄梗枌杞梓杉櫟櫛梢橫青天根連地軸鉅細畢
輸長短悉錄駕雲車之百輛振龍驤之萬斛紛紜輻
輳彌布川陸厥材之良不一而足若乃美石比玉從
古所稱瑩者如圭潔者如瓊溫者若璐潤者若瑛以

磨以礮乃堅乃貞鏗林振壑馳颺驚霆千夫所攻萬
里啟行山靈助其光華坤后發其精英豈砭砭之敢
混實寶玉之爭呈若夫坎離播功坤艮合德出於陶
冶成於埏埴飛紫燄於半空結祥烟於八極或規以
圓或矩以方燦琉璃之一色耀文采於中央或肖形
於獸吻或擬質於鴛鴦於是良時載啟吉旦既卜臣
庶駿奔滃若雲矗源源其來登登其築百堵皆興萬
夫相屬行若魚貫立若鱗鬣斧斤揮霍尺度攢簇由

是責育效力公輸獻奇曰及曰斯伯與暨垂攄厥巧
思運厥神機各效其能以見於為顧小善之並錄矧
妙伎之或遺羣材礪磊以山積鉅棟騰躍而翬飛爾
乃九門洞開三殿攸建觚稜雲聳丹漆霞絢輦路逶
迤閣道迴轉華蓋屹立乎中央奉天端拱乎南面其
北則有坤寧之域乾清之宮璇題耀日寶柱凌空金
鋪璀璨綺疏玲瓏珠玉炫爛錦繡丰茸葳蕤起鳳天
矯盤龍千門瑞靄萬戶春融其南則有午門端門左

掖右掖丹闕峙而上聳黃道正而下直豁大明之高
張屹正陽之拱揖繚周廬之穹崇蔽重慶之護翼其
左則有宗廟之祀以奉祖考仰在天之神靈隆萬古
之尊號謹歲時之烝嘗薦純誠於蘋藻其右則有社
稷之靈以崇祀享汎壇壝之肅清通神祇於肸鬯爰
春祈而秋報用昭荅於靈貺若夫乾清之前門列先
後日精月華之對峙景運隆崇之並構謹身翼乎其
前仁壽屹乎其右又有奉先之祠大善之殿文樓武

樓之特聳左順右順之並建若乃震位毓德文華穹
隆亦有武英實為齋宮有天財寶藏以貯珍貨有大
烹光祿以典飧養寶善在左以翼翼思善居右而崇
崇若夫欽安之後珠宮貝闕藻繡交耀雕櫳戩巢六
宮備陳七所在列親蠶有館縑絲有室二南詠歌播
於篇什輔德相承風化洋溢皇城之外殿宇魁渠有
翼有嚴太孫之居金水之濱瑤階玉除梁棟巍巍上
凌太虛為諸王宮翊衛皇圖星羅棋布以臨九衢至

若丈淵之閣祕書之府纂述乎今儲蓄乎古汗牛充
棟莫知其數牙籤迤邐紺帙旁午燦奎壁之上連赫
虹霓之夜吐若夫飛閣戕戕實為承天繡楹霧簇畫
拱星聯踞石猊之盤礴聳華表之巋然至若南郊之
設特超古制園丘方澤不歧以二合祀於中父母天
地壇分內外二十有四羣祀有典百神有位惟我太
祖實配上帝乃歲孟冬三陽之始吉日斯蠲祀事有
備薦以粢盛泛以醴齊豆籩秩秩庭燎晰晰鼓鐘戒

嚴鑾輿至止儼對越以升中祝蕃禧之攸萃至若山川有壇先農有祀馬祖旗壽縣各以時祭寅畏恪恭罔有弗至若夫稽古建官為民之牧內外相承各率其屬至若黃門給事青瑣仙班典內庭之封駁近咫尺之天顏復有文翰之林詞藝之苑處嚴密之清禁列英華之妙選優游玉堂之署出入金鑾之殿擅瀛洲之美譽承黼屨之清問至若鳳池之職尚寶之司掌絲綸於紫誥典符璽於彤闈有宗人以統天潢之派

有銀臺以通喉舌之機若乃六卿分職位躋台鼎贊
廟堂之謀謨總藩方之政令至若憲臺之任風紀是
司誠耳目之所寄實法度之攸施若夫都府有五軍
政是宣奮貔貅之將士耀霜雪之戈鋌保圖輿於安
堵埽絕漠之烽烟至若都邑有庠辟雍有學育才於
茲以儲以擢若夫容臺典祀士師明刑錦衣總夫儀
衛巡警係於五城鴻臚謹朝謁之禮太僕司監牧之
名京畿布列於州郡田野參錯於屯營至若奉神有

祠報功有廟梵宇琳宮光輝朗耀倉廩之積如坻如
京露積紅粟陳陳相因鎧甲晶熒士卒精銳靡強弗
摧靡堅弗碎驂騑驥騾裊驕驕宛冀之駿渥洼之
良充乎內廐磊落騰驤又有福山後峙秀出雲烟實
為主星聖壽萬年層嶂疊擁奇峯相連鼓鐘有樓其
高接天勢若貫珠萬里綿延若乃朝市既成井邑斯
列閭閻輻輳閭閻有截豁九達之通衢羅萬室之如
櫛富商巨賈肩摩袂接北通朔漠南極閩越西跨流

沙東涉溟渤來百貨之縱橫雜輪蹄之填咽珠璣爛
其輝燿羅綺燦其騰眚至若青樓並峙綺榭相連妖
姬窈窕豔女嬋娟穠妝競倚粉黛爭妍引歌喉之宛
轉迴舞袖之踴躍極酣嬉於暇日窮勝賞於芳年至
若太液之池萬歲之山澄波激瀝層岫巔岼開闔蔽
虧縈帶迴環竦飛樓於曖曖敞貝闕於巖端門臨碧
蘚之磴橋架玉虹之灣晴光出乎軒檻飛翠灑乎闌干
瞻廣寒之月殿撫桂樹之團團爾其瑤草龍蔥琪樹

羃慮長松之盤古柏之直修篁烟挺老檜雲積瑰偉
之姿竒異之植蓊然其陰嫋然其色宛蓬瀛之在茲
恍塵凡之遂隔至若上林衍沃靈囿逶迤瀦以碧海
湛以深池百草綠縟羣卉芳菲寬閒薄乎禁籞平廣
屬乎坤維樂鱗介之游泳縱毛羽之離褻乃有騶虞
效祥麒麟表瑞白質黑章麋身牛尾神鹿貢於遐方
白象出於南裔倏元兎之繼呈忽天馬之沓至復有
馬哈福祿厥獸殊形駝雞之異白馬之禎竒姿詭態

率舞縱橫隸首莫紀伯益難名至若地祇協順天心
昭格嘉祥疊臻靈貺蕃錫神木不運而自行祥氛煥
發於巨石忽靈蛇之前導現大青於沙磧瑞光煜乎
半空卿雲縵兮五色醴泉湧兮瓊漿甘露滑兮玉液
靈芝產於碧山景星見於南極禿干兔以難窮殫百
喙而莫悉然而歷觀前代迄於往古帝王所都難以
畢舉豐錫之美峻函之固宛洛之奇汾晉之富雖或
雄據於一時控馭於中土而於今茲帝都之壯麗又

豈可以同年而語哉迺歲庚子告成厥功辛丑正旦
方春和融聖皇御寓萬方會同百辟卿士肅肅雍雍
蠻夷戎狄罔不率從戴白之叟垂髫之童且欣且忭
拜舞呼嵩仰祝聖壽萬福來崇慶此皇都佳氣鬱蔥
擴基圖於萬世偉壯觀於九重真帝王悠久之業據
山河表裏之雄然而聖天子以六合為家以四溟為
池以仁義為干櫓以禮樂為藩維不恃險以為固惟
在德之所施至和塞乎穹壤恩澤洽乎華夷致九有

以寧謚躋萬國於雍熙此其所以德侔乎堯舜道合
乎軒義窮天地亘古今而莫能與齊也臣職禁垣叨
蒙眷顧謏劣是慙涓埃莫補覩皇都之巨麗壯宏規
於往古潔泓穎於長辰陳盛事以為賦又從而為之
歌曰翼翼皇都萬方之會兮聖德之宏實同覆載兮
聲教所暨一統無外兮又歌曰皇都翼翼民之所止
兮惟皇萬壽福祿無已兮聖子神孫寶祚萬世兮

北京賦

李時勉

惟皇明之受天命也我太祖皇帝首仗義師以平暴
亂豪傑景從聲振江漢削除僭竊拯民塗炭定鼎金
陵撫綏萬邦乃睠茲土實雄朔方倣成周之卜洛欲
並建而未遑逮我聖上繼明重光握乾御極一遵舊
章仁聖洋溢乎遐邇恩澤汪濊於八荒既致治於太
平遵皇衢以省方仰先志之未遂度弘規以作京羌
經營之伊始徧中夏其歡騰曰惟北都在冀之域右
挾太行左據碣石背疊險兮重關面平原兮廣澤宗

恒嶽其巍巍鎮巫閭而奕奕冠九州之形勝實為天府之國是以軒轅邑之以分州唐堯階之以為帝擴神化以宜民大勲德之光被鬱王氣之所鍾於今茲而有待也於是仰瞻析木俯測地靈龜筮兆吉天人叶應神祇獻珍而山石自出河嶽效靈而神木自行民子來兮相續期不日而功成爾乃懸水樹臬識景表營方位既正高下既平羣力畢舉百工並興建不拔之丕址拓萬雉之金城引天泉於西阜環湯池而

鏡清九衢百塵之通達連覺邃宇之縱橫顧壯麗其
若此非燕逸而娛情蓋所以強幹而弱枝居重以御
輕展皇儀而朝諸侯遵先軌而布仁政者也若乃四
郊砥平皇道正直視萬國之環拱適居中而建極其
南則萬流宗海平林蔽天攬邯鄲鉅鹿之廣衍馳平
疇沃野之縣延滄淤恒衛徑其野濡磁涑滌滙其前
界以大陸廣阿之弘壤阨以大茂井陘之連山包絡
趙魏襟帶齊魯膏腴之地縣亘三千餘里而極於黃

河伊潁之川其水陸之所產卓犖繁盛蓋莫得而計
焉其北則疊嶂疊巖層巒蔽虧長城矗乎雲表百泉
湧乎山隈壯天關而設險守一夫而莫開偉左盤而
右顧宛鳳舞而龍飛實磅礴而鬱積粵擁衛於邦畿
包狼山上谷之險據野狐獨石之危掩祖山木葉之
離立連白登紫塞之逶迤控女真而極乎洮河之北
鎮朔漠而逾乎瀚海之湄控弦之類射雕之羣畏威
懷德相率而來歸其東則潞河通漕控引江淮肥如

灤涑灌注縈迴連峯片石之隘首陽崆峒之厓玉田
白壁神仙瓊臺超無終而越金山跨遼瀋而逾鴨綠
至於暘谷日出之涯固已遐哉邈乎而莫不在乎綏
懷環以大海衆水所歸洪濤巨浪洶湧崔巍蓋不知
其幾千萬里而蠻商番舶帆檣隱天上下不絕而往
來又有蓬瀛方壺鳳麟聚窟十洲三島靈異非一琉
精之闕瓊華之室墉城峇堯金臺翠律紫氣丹青景
雲矚日靈囿倏佺安期羨門之倫相與遊從乎其間

出入隱現而恍惚瞻帝京其伊邇庶可見其驂鸞駕
鶴之髣髴其西則崇山鬱翠高挹泰岱北接居庸南
首河內奇峯擁闕龍門阻隘玉泉垂虹青烟浮黛上
栽稟兮倚空下蟠據而際海其麓則有渾河湯湯西
湖泱泱鹽溝琉璃桑乾廣陽雪波泛湧灝漭汪洋一
瀉千里會流帝鄉又有上林禁苑種植蕃牧連郊踰
畿緣丘彌谷澤渚川匯若太湖瀛海渺瀰而相屬其
中則有奇花珍果嘉樹甘木禽獸魚鼈豐殖繁育颺

馳籍籍不可得而盡錄固可以因農隙而校田獵選
車徒以講武事乃遵國風稽王制詔期門簡將帥乘
玉輅擁翠蓋出天闕而雷轟轆芳郊而雲會非所以
威戎誇敵娛樂稱意蓋將取不孕而除菑害狩無澤
而順殺氣謹大易之用於三驅之時驗騶虞之仁於
一發之際水衡虞人之容與武夫壯士之奮厲皆知
夫仁者之為勇而以投石超距之足鄙亦何必殄夷
禽獸割鮮野食而以俯仰極樂之為貴也若夫宮室

之制則損益乎黃帝合宮之宜式遵乎太祖貽謀之
良居高以臨下背陰而面陽奉天凌霄以磊砢謹身
鎮極而崢嶸華蓋穹崇以造天儼特處乎中央上倣
象夫天體之圜下效法乎坤德之方兩觀對峙以嶽
立五門高矗乎昊蒼飛閣屹以奠乎四表瓊樓巍以
立於兩旁廟社並列左右相當東崇文華重國家之
大本西翊武英嚴齋居而存誠彤庭玉砌壁檻華廊
飛簷下啄叢楹高驤闔闔闔而蕩蕩儼帝居於將將

玉戶燦華星之炯晃璇題納明月而輝煌寶珠焜耀
於天闕金龍天矯於虹梁藻井煥發綺窻玲瓏建瓴
聯絡複道迴衝軼霄漢以上出俯日月而盪胸五色
炫映金碧晶熒浮輝揚耀霞彩雲紅其後則奉先之
殿仁壽之宮乾清坤寧眇麗穹窿掖庭椒房閨闈闕
通其前則郊建園丘合祭天地山川壇壝恭肅明祀
至於五軍庶府之司六卿百僚之位嚴署宇之齊設
比館舍而並置列大明之東西割文武而制異至於

京尹赤縣之治所王侯貴戚之邸第辟雍成均育賢之地守羽林而掌飲飛者至九十而有四衛莫不井列而綦布各雄壯而偉麗其巖廊之上則有皋夔稷契之倫元凱俊乂之輩相與賡虞廷之歌談羲農之際罄補袞之能懷忠貞之志考禮文於大備贊聲樂之盡美是以朝無缺政德教漸暨薄海內外均陶至治幸具有作聿來趨事成此大功忘其劬勩人和既極休徵滋至慶雲瑞靄之覆於闕庭素烏元兔之獻

於丹陛醴泉屢出甘露數墜麒麟騶虞之珍馴獅天
馬之類紛紜雜遝莫能殫記於以見天眷之益隆而
聖德之純備者也於是正月上日工既訖功爰告成
於天地肆紹美於祖宗清心凝慮齋沐肅雍染盛既
潔牲牲既豐芬郁郁以旁達靈續續其來降錫嘉貺
之穰穰介景福於帝躬將順應於昌期趾盛美於無
窮乃服袞冕御帝座開九重之深宮受萬邦之朝賀
內侯甸而要荒外殊方而異俗胥近悅而遠來紛鼓

舞而匍匐方物溢以充庭麥紉燦而駭矚率蹈舞於
階墀效華封之三祝爾乃決和會昭景鑠鏗鯨鐘奏
雅樂詔光祿以開筵合百辟而燕樂饌珍玉兮芳馨
壘瓊漿以斟酌聯貂蟬兮夾陛雜蠻夷之荒服莫不
酣暢而飽德咸頌歌而踴躍越填城而溢郭藹歡聲
於寥廓斯可以婉太古之無為慶華胥而蹈栗陸顧
皇上之謙抑視至治為未足於是降德音播嘉惠省
刑罰薄斂稅汰冗濁旌廉吏舉賢才擢俊乂發倉廩

賑貧匱尊高年而禮有德慎防禦而修武備貴爵重
賞以厲廉恥厚往薄來以馭夷裔蓋欲使人知其本
士知所勵四方萬國無一民之失所窮陬僻壤無一
物之不遂舉陶於春風和煦之中而樂於雍熙泰和
之治此蓋堯舜兢業之心文王敬止之意所以紹鴻
業繼先志益宏遠而有偉故不勞而甚易冠絕乎前
古垂休於後世固可必聖子之與神孫益昌盛而無
替小臣微陋忝職文字願賦帝都之盛概揚國美於

萬禩復為之歌曰煌煌帝都兮逾鎬豐阻山帶河兮
壯以雄天開日月兮王氣所鍾穹隆造天兮惟帝之
宮廓氛祲兮開溟濛鎮夷夏兮宣皇風王道平平兮
四方來同願皇圖之鞏固歷萬世兮無窮

恒山賦

王 昺

惟大化之沕穆兮麗夫天地而為依日月賁以貞明
兮山川環帶而相維嶽於大漠兮嶄然巨石之嵯嵯
奠八柱於鼇極兮鬱乎四海而揚波接烟煴於鴻濛

兮作大鎮於龍荒聳相觀於八極兮一何隳突而昂
藏吐靈秀以昭化兮興陰陽而噴薄何神驅而鬼驚
兮渺茫茫兮寥廓崇秩禮於百王兮相祀典於邦伯
挺萬象於昭明兮並九坑而赫奕肅清廟臨宮蒼矯
霞棟架雲梁掩河漢兮遏星斗振虹蜺兮凌日光被
玄袞兮載靈旗雲屏屏兮風披披忽而來兮儵而往
窅乎上下其何之作風雷以怒壯兮雰雨霧而溥滋
載羣生以涵育兮仰配藜之四施興寶藏以炫珍兮

滅妖氛於既戢含衆氣於有揚兮分兩儀而特立建
天根於丕丕兮載坤軸而無彊相國祚於有靈兮一
何萬古而為長

龍虎臺賦

江
乎

吾聞幽都之山崔嵬崑崙之嶺方紆鬱幾萬里兮挾居
庸之南出壯乾坤之險阻兮開混沌之端倪滴龍盤
而虎踞兮屹高臺之巖岨右太行之戕戕兮左江海
之湯湯負天關之巔負兮面紫極之清光觀夫臺之

為壯也則博敞個儻朝昏來往嶽岑參差日月蔽虧
軼陰雨於太半俯星辰於下墀溘氛埃而軼浮景兮
出凌兢而入太微吾亦不知其高廣之若是兮蓋天
地之所為若乃峻嶺截嶺撐鱗奮鬣周迴連蜷蜿蜒
蜿蜒林蒸潤而雨降崖轉石而雷喧勢將騰海水而
噴薄鼓顥氣而飛天吾是以知臺之所以名龍神變
化而無前至若嵌巖豁豁有呀其牙孱顏岑岑而爪
而攫春花明而文炳飛泉咆而慄魄衆山奔騫於其

下兮若百獸震掉披靡而前却吾是以知臺之所以
名虎雄萬古而磅礴爾其季春厯日法駕北巡五輅
輝煌萬騎紛紜鸞旗鳳蓋之粲麗金干玉戚之晶熒
警蹕既啟天顏甚邇散皇風以矚幽考聲教之所被
吉行信宿於焉而止喜地勢之高平縱登望之蒨蒨
乾心降而徵怡都人仰而稱偉於是名臣良士朱虎
夔龍迷清飈於有土虛元氣於太冲鼓舞六合奮躍
羣雄出淵潛之滯跡起巖穴之幽蹤吾又知夫臺之

所以名龍虎不獨山川之勝又快風雲上下之相從也嗟夫威加四海知霸心之猶存直計百金昭儉德之為至圖功業於丹青致獲良於千里是雖可以壓銅雀而下姑蘇又豈足以並茲臺之美歌曰瞻彼層臺聿穹隆兮肇基太始垂無窮兮爰考休徵熙淳風兮於昭靈臺與俱崇兮

登封龍山賦

石珣

石子抱病登於封龍覽燕趙之墟望滄溟之浦慨然

太息顧謂二三子曰美乎佳哉此陶唐氏之故都也
巨嶽雄峙長河駿奔崇岡複阜如抱如蹲萬壑凜流
匯為九澤大行崛起溢出平原川橫夏后之櫬地藏
虞舜之壁八年於外地平天成五月朔巡諸侯萬國
天文別野星當昴畢之區土壤分州域介幽并之宅
川紆嶺迴鬱鬱崔崔峭壁聳秀丹峯凝輝晴瀑挂百
尋之長練顛崖轉萬國之驚雷上有蔽日干霄之古
樹下有陵遷谷變之寒灰俗有避秦山多人晉岳被

重封川經幾濬虎嘯風列龍行電迅寒烟色舊李公
燈火之臺古石光寒季子合從之印萬里交乎胸中
千巖縱其一瞬其東則古之大陵也波洄鏡縈曼衍
鏗鉤芟蒲芟荷肅乎風生海鳧來遊鷓鴣互鳴放乎
觀津之野帶於平棘之城漁浦流歌廊廟隔江湖之
興秋郊舒嘯英豪含感慨之情竇氏青山馮唐故宅
納牖道言引卮正色園仍茂草逢下帷之董生饁有
高賓見耕田之冀缺人傳擊筑之歌士有談經之業

貞觀章疏一代忠良稷下遺書六經羽翼疇非治望
乎唐虞豈獨事闕乎列國其南則漢之鉅鹿鄆中也
臺隍尚存烟屯霧昏想中興之舊業或寄跡乎荒原
蕪蕪存豆粥之亭滹水望冰漸之渡北道主人塵埃
物色對竈將軍雲龍際遇地存京觀李華興弔古之
詞士遇明時文達展登瀛之步亦有閭閻池臺尚存
平泉古樹閭里高門或三世而居司業或父子而握
絲綸文妙一時張鷟號青錢之選才優當代衛公陳

丹宸之箴翺有文章名崇史館絳真宰相官處詞林
其西則戰國之陘山也山愈巔坼水愈潺湲橫峰似
劍列臺為闌平臨三晉遙控全燕車不方軌士可當
關料敵幾危痛左車之不遇燒丹火候訝隋女之登
仙雪霽西屏冰封壁合雲鎖抱犢墮佩遺鈿誰登望
海之亭直下螺蜂之境地出危簪天開峻井龍蛇蚴
蟠雨自東來麋鹿犇張泉從地湧劉因有志登福地
而高吟敬仲多情撫遺蹤而自省篇成寶劍代國神

遊文慕香山司空興冷悵九原之莫作幸吾生之登
騁其北則古之中山曲陽也陵阜迤邐達於代邊隧
通窮漠谷帶長川萬籟號風危城際天士如貔虎人
擁戈鋌名寢秦謀共畏廉頗之勇喟興漢髀人思李
牧之賢宜安城復再收趙境武靈臺古遙下胡弦地
存畫卦之臺巖有棄瓢之叟夢得一世之詩豪李嶠
諸儒之領袖安平之崔下曲之魏累代名才靈壽之
曹豪城之董一時勲舊朱綸紫綬門第猶雄取印提

戈聲華未朽問其士習則樂孝友敦詩書不侵然諾
砥礪廉隅氣不可平直欲裂強秦之缶清應有志幾
思登孟博之車節奮於窮壯形於老頸可刃而身不
可屈頭可斷而碑不可草觀其民風則力織作勤畎
畝童稚為婚雞豚娶婦族多辨類等其清濁禮謹送
終稱其無有至老猶勤雖貧不困人各守其淳樸俗
頗希乎渾沌其尤在可稱者士不妬才人多服義彭
亨狡獪雖貴蒙嗤清介端良在微亦貴野無健訟之

民官乏舞文之吏上不煩於刑誅下易為乎禁制此
固先王舊澤雖經變故猶縷縷而未衰然實聖代洪
仁漸染百年首股肱之近地者也所可憾者人不思
遠家無素蓄西成遺秉簫鼓連邨春事轉空券書絡
繹平疇多發冢之夫柱楚有勒文之石民不知兵易
為搖動地無守險輕相躡蹠蓋自列國之擾五胡之
亂開元之掠長平之怨女真之入蒙古之僭谷變千
回地經萬戰民無固志殆土崩瓦解遭亂離之孔多

俗有俠情豈擊劍衝冠習流風之未變者乎嗟乎燕
趙之地先王封建井田之地也燕趙之民先王衣裳
冠帶之民也燕趙之俗先王禮義忠厚之俗也奈何
世治則有世亂則走晉既東奔宋亦南狩或割地以
求成或退兵而盛守使夫河嶽增悲金湯冒醜衣冠
興歎草木蒙垢資壯士於敵國納寇讐於戶牖棄神
明之舊域設逋逃之淵藪人不為怪士不知詬亦獨
何哉此固有家國者之遠謀然亦士君子之宜憂不

然高門縣薄華冕輕裘致身要樞列位公侯徒因時
而補益亦何貴於名流亂曰山有摧兮石有泐疇造
化兮無紀極亦何為兮多太息

泛滹沱河賦

石珪

介然子將如東瀛放舟於滹沱之浦覽郡國披山川
辨土壤聆風泉俯象六極仰窺無垠問遺俗於故老
招海上之飛仙於是揖漁人而進之曰子亦知夫茲
水之源乎出自繁時經於代谷放乎鴈門之坂帶於

太行之麓朔方巨嶽實扼其胸恒衛諸流半入其腹
氣吞萬壑激硤礧而未平勢應三泉墮平原而愈盛
時乎春冰乍融積雪方解支流趨順客浪藏駭迂迴
漫延千里一帶雷石成渠鏘波赴海干城藉其潤色
萬畝資其灌溉鏗錚鳴帝子之環嘔軋散將軍之凱
編桴賈客燈火輝煌罷釣漁郎歌聲歎乃方洲乍晴
倏昏忽明擘神農之遺譜得靈均之杜衡及夫積霖
未止秋水大至巨濤圻空駛溜軒地律令助威飛廉

擁勢海若為之改容巨靈因而避位鯨翻渤澥鬼母
長嘯虎栗昆陽英雄失智山刊菑翳野誅樸檄先驅
一指崩沙潰屋怒留城邑薪藁如雲殃及鰭鮫僵尸
遍谷亦有傾城摧山變陵不雨而怒無龍而興湍隨
鯢徙勢若雷崩斷岸蒙隤殷輪牟赤平岡被齧戈戟
猶青霆擊斷趺訝魚龍之識字渚留袍笏豈犀火之
通靈乃有泗濱磬浮汾陰鼎見寶鏡入秦號鐘歸梵
涇陽嫁女簫鼓猶喧龍叟射綃波濤飽戰壤百尺之

長橋剗千年之古塹人懷魚鼈之憂國有沼池之歎
忽幾劫之餘灰出昆明之一旦蓋自列國兵屯朝齊
暮秦盟渝韓魏兵來蘇門趙國上卿功名一擊平原
公子車騎長奔虎狼勢成合從事緩頗牧既亡望諸
已晚建不出援丹空起變常山之蛇陣徒存主父之
龍顏幸返復有劉項相雄赤旗建功淮陰古壘東垣
廢宮王霸詭冰再光舊版蕪亭飯麥猶著遺忠保河
北以待朕亦何異於關中乃至開元弛網漁陽肆毒

投鞭斷河驅王入蜀常山太守首扼天下之吭帳下
豬兒竟破羯奴之腹惟宋有國茲當九陲契丹伺便
西下來窺築甬梁津任布有備邊之策山崩海覆劉
靖興致死之師自餘紛紛以暴易暴中更幾秦世歷
多號劉琨有志獨枕長戈虞詡難逢空增萬竈太平
之日少於戰爭中原之俗半多鬻競是宜地下白骨
多於黃土長河東奔為泄其怒摧車卷甲盪百世之
餘凶濺沫飛流刷遺羞於千古山蓋不得不峻水蓋

不得不駛陵谷蓋不得不變城市蓋不得不徙
是天時人事交會之偶然亦豈惡殺好生造化之
得已者乎乃知天本待人也亦藏宅畀吾祖宗增其
式廓既定鼎於金陵又相居於恒嶽若成周之豐鎬
復營邑於伊洛於是山多獻靈川亦效職噓氣成雲
蒸地得澤不須劉累豢靈沼之二龍亦有豫且得白
龜之徑尺木多杞梓自河而東波有鯉魴望海而入
其有異氣蘊鬱孕為賢良輝煌事業璀璨文章高門

大纛紫綬金章或名流乎林藪或身負乎網常乃若
蘭陵著述功裨墳典文貞諫論治逮成康閣敞平津
屢屈吾丘之博辯屏張便殿猶存李絳之封章武惠
忠誠身兼將相韓維兄弟並在巖廊趙賓客之名懸
調燮黃牧伯之風挽循良一代龍頭世頌文忠之相
業兩朝司馬名登恭敏於旂常是其在昔有作於今
益昌孰非山川之所鍾毓地氣之所敷揚者乎矧吾
生之行休值海波之方晏駕木蘭之長舟縱千里於

遐覽橫桓伊之古笛飽廉頗之一飯藉荒磯之芳草
憩清風之別館采江離以為佩畦揭車之九畹悵九
原之莫作想古人之如見於是流魚出波沙鳥鳴苑
月華窺林露色淒晚樂未極而悲已生日已夕而路
猶遠既引領而高歌又一唱而三歎浩浩乎飄飄乎
蓋不知吾之所欲之而忘吾之所欲返也歌曰山窅
窅兮波鱗鱗臨長洲兮思古人魚來迎兮鶴與吟惟
秋鴻兮北以南志不可騁兮樂不可殫還余舟於江

皋兮吾將續先王之遺音

遊盤山賦

唐順之

惟陰陽之陶冶冥顛倒乎兩儀天星隕而為石駭滿
山之置碁搜萬象以效珍何殊狀而相亞或藉草而
羊眠諒仙術之幻詐或負嵎而虎蹲詫飲羽之神射
或餽餽而欲走類靈鞭之叱咤或屹立而不動豈思
婦之所化既簇隊以縱橫亦累卵而高下紆十步而
九曲下枉矢乎石罅逮礪硯之厯盡忽拔起乎孤峰

俯子孫之千億儼高峙而稱宗倚禪宮而凝睇曠天
宇之澄空向之紛紛怪石忽若懷寶而藏弓但見夫
萬木蓊翳而青蔥一勺之泉大旱而不竭兮人言其
下潛乎蛟龍女蘿薜荔紛披而交映兮七十二寺隱
見森羅乎其中疑有悲歌慨慷之士不得志而自隱
與夫仙靈逸客往來而相從欲即之而無路兮時見
一二野僧啟巖扉而鳴鐘侈佛廬之繁夥厯歲久而
不蕪饒萬樹之梨栗以衣食乎其徒何叢木之岑鬱

無一鳥之孤棲餘邊城之殺氣警羽鏃而遐躋泉觸
石而鳴箏松受風而響濤時琤琮而乍噎倏悲吟而
怒號憶連旬之巡歷餐金鼓之嘈嘈審聞性之不異
任羣籟之相遭適愜悅而延佇忽四山之暝色謝耳
目於送迎向僧齋而偃息恍夢景之如醒覺餘興之
未極晨起歷乎上盤境逾奇而路逾棘方躋躬而俯
穿又縮足而仰捫驚半踵之在外愁欲度之猿援待
平柯於高頂接雲間之飛翼山童禿而無木響草蟲

之唧唧岫遠拱而戟森岡道繞而弧彎乃下瞰乎城
郭曾不盈於一環類黃鵠之再舉見紆曲而覩圓方
悲人生之局促恒豐蔀以自藏眺溟渤之南滙子碣
石之中巉轉秔稻於東吳駛萬里之雲帆笑卅鍾而
石致曾不及乎凌波之艤連岡北矚天設桎杙列墉
分成隔限分處兵戈陣戰孰敢余侮嗤邊人之桀黠
乞哨卒之餘俎雖隄火之暫虞竊金城之永固惟山
勢之既極俄湧塔之天造顯佛牙之光怪騰麗空之

碑礪覽小道其若斯信精神之為寶胡俛仰而成陳
忽徬徨以回步悵中心之有違足屢却而返顧與流
泉以偕逝睠巖阿而長憶豈淹留之無心畏簡書之
偁仄

弔夷齊賦

王世貞

盧龍故孤竹也城西有伯夷叔齊祠吳人王世
貞奉使過此酌水酌焉而為辭

曰余奉輶以東逝兮東馬放乎令支山巔岬而崑巖

兮衆草贊藿而條緯俞兒道余於卑耳兮武夫磷磷
其參差曰青帝之握樞兮顓改照沱寥而憺悽元宮
承雲而黠霸兮僉告余二子之所都羗回慮以返照
兮澶忍踏靡而內疑足次且欲卻兮又雀躍而前趨
段含光剗余之素兮挽清冷使濯余之歲裏招沆瀣
以醞醴兮裹朝霞以為饔餽噓元冥之竅機兮噫噫
拊歌之懽愴受哀絃於太娥兮涓延和之以清商靈
蕭蕭而若覩兮冀回魍燭乎微躬又惝恍其不可即

兮掌夢疏帝以奚從眺孤竹之亶曼兮台要靈以故
初生剽舉而脫屣兮寧鬱鬱處彼幽方溟波委輸於
樂浪兮箕蒙難而延宗靈庶偕以翺游兮語侏離而
不可通北海決潏靈所辟兮受淳滴使不得寧將歧
豐沃以愉兮靈又薄周德而莫宮諸毗綿延具區兮
太虞夷猶於其旁羗德配而耦娛兮靈謂狎附乎周
盟陂陀首陽忽靠寧兮益蔽以荃之芬芳靈閭闔而
下臨兮將綫駕以憩息掌夢申申以表誠兮豐隆夷

而來假輓車殷殷以翩續兮皎雙鴻之次翼匪寶璐
而陸離兮舍離芷以彌馥介九賓而見余兮祝史要
余以靡忒伯從父以成命兮叔違親以成德俶舍君
以明志兮既殉主以明極昔巢許之讓皇兮托勲華
而稍佚尹五就而拯塗兮愀然面故主以惶怵謂題
跂以死名兮莊任誕而廢節遷曉曉於驥尾兮嗜微
聲之有托彼累修辭而求白兮卒牢慙沈乎湘澤繹
鄙人之無怨兮適從容於天則世滔滔而悲涌兮戰

伐莽其相仍顧蒿目以俟攬兮競含沙而蠱光騶虞
草以伏食兮於菟誇咀夫衡生陽鱗之齧纖鱗兮偃
蜺神龍以自矜靈既悼農虞之忽沒兮氓躑躅而殷
慕愧突梯之苟容兮將捐足乎靈御胡司命之不紊
微兮抑鋪糟以昏驚盼媼娥之要渺兮捐濁軀而不
反顧

畿輔通志卷一百十五